

rium excipiunt, ut intermissam ab eo Historiæ seriem, ad mortem usque Johannis Galeatii, primi inter hujusce Metropolis Duces, accurata gestarum rerum narratione prosequerentur; unde nobis dedicandi libri petitum est argumentum, gratius existimantibus patriarum vicissitudinum lectionem exhibere; quæ licet in perpetuos commentarios cura & ære publico à laudatissimis viris redactæ per manus omnium circumferantur, non satis tamen veritati non uno in loco respondere cognovimus, ea præcipuè de causa, quòd recentiores Historici styli barbariem evitantes, dum latinas cultiores voces adhibent, mirum quàm diversas à vero factorum rerumque notiones incautè supponant. Præstantius itaque ex ipsis fontibus præteritorum temporum memoriam repetere, & Majorum imagines puris coloribus expressam contemplari.

Et sanè quàm sincera & vero simillima felicissimæ Urbis facies à Scriptoribus nostris utcumque barbaris per ætates omnes representatur, postquam everso Romano Imperio, cum quo vires & opes, positis armis, communes fecerat, in potestatem efferatarum Nationum vènit, & sævissimas clades iterum iterumque passa, regiam dignitatem, etsi calamitatum horrore obumbratam nunquam deposuit, sed instaurato rursus Regno nova semper majestate fulgida proximum Romanæ Urbis locum occupavit, & Metropolitanico jure potens ad reparationem Romani Imperii, sub quo felicissimè vivimus, Italicam coronam suam ultro contule-